

Regenza examinescha dretg penal

Success per l'incumbensa Cramerì

■ (anr/fa) Cun 94:21 vuschs ha incumbensà il parlament grischun la regenza da far in rapport ed ina proposta davart ils custs da procedura per pitschens delicts. A l'avis da la maiortad èn quels custs savens smesirads.

Ils chantuns han la pussaivladad da normar il dretg penal da surpassament, uschenavant che quel n'è betg object da la legislaziun federala. Ultra da quai pon ils chantuns smanatschar cun sancziuns las cuntravenziuns cunter il dretg chantunal. En il dretg grischun datti numerus causals penals che ston vegnir examinads, quai è l'avis da *Reto Cramerì* (pcd, Alvaschagn) e da la maiortad dal cussegl grond: «I sto vegnir analisà sche causals penals sco disturbis e mulestas massivas u la visita dal Parc Naziunal Svizzer da scolas e gruppas da giuvenils senza guid correspundan anc al temp.» En pli vulevan Cramerì e 96 deputadas e deputads ch'avevan sutscrit sia incumbensa ch'i vegnia evità da metter en quint custs da procedura smesirads per delicts da bagatella sco p. ex. tralaschar da marcar rodas dublas externas da 20 centimeters vi d'in tractor. «Sch'ils custs da procedura surpassan però la multa pronunziada per pliras giadas daventan quests custs da procedura facticamain la multa, e la multa sezza, la sancziun sco tala, daventa chaussa secundaria», ha ditg Cramerì, ed illustrà ses exempel dal tractor cun cifras: «Sch'il pur emblida da marcar las rodas dublas sto el pajar 60 francs multa, ils custs da procedura s'amuntan a 490 francs.» La regenza aveva proponì da refusar l'incumbensa Cramerì. El ha perquai pretendì discussiun.

Refusa la regenza da far la lavur?

Bruno W. Claus (pld, Cuir) ha criticà che la regenza nun haja examinà l'incumbensa Cramerì da maniera differenziada. «Ils custs da procedura surtut per cas da



Malgrà tschertas resalvas è l'incumbensa da deputà Reto Cramerì vegnida acceptada cun gronda maiortad.

FOTO O. ITEM

bagatellas èn simplamain memia auts, la decisiun da refusar l'incumbensa signifitga era da refusar da far la lavur pretaisa da dapli da trais quarts dal parlament», ha el ditg. *Emil Müller* (pbd, Sur Tasna) ha menziunà in auter exempel per custs da procedura chars: «Sch'in automobilist va memia spert cun ses vehichel avess el da pajar 40 francs multa, la procedura al custa però 245 francs, quai na po betg esser la finamira d'ina multa.» *Bernhard*

Niggli (pbd, Aschera) ha agiunt che la polizia chantunala fetschia savens controllas e dettia multas che sajan colliadas cun gronds custs da proceduras. *Andri Perl* (ps, Cuir) ha ditg che la fracziun da la ps saja vegnida tar l'incumbensa Cramerì en in dilemma: «Nus avain gronda simpatia per l'intenziun generala da l'incumbensa.» Els sustegnian plainamain ils puncts 1 e 2 (vair fanestra), ha el ditg, «tar ils puncts 3 e 4 dentant essan nus sceptics:

L'instrument d'admonir pudess chaschunar problems legals ed ils custs da procedura avessan uschia da sorprendere il pajataglia, quai na fiss gist.» El ha fatg la dumonda d'acceptar l'incumbensa Cramerì, da stritgar però il puncts 3 e 4.

Conflict cun leschas surordinadas federalas

Cusseglia governativ *Peter Peyer* ha ditg ch'ins stoppia resguardar en chaussa

dretg penal dus nivels: «il dretg chantunal dad ina vart e da tschella il dretg federal, il qual è surordinà». Sco ch'el ha accentuà hajan ins gia adattà divers puncts dal dretg penal chantunal l'on passà cun reveder la lescha da polizia grischuna. «La realisaziun da questa incumbenza fiss colliada cun blera lavur e custs e na manass però praticamain nagina plivalur a favur da la generalitad.» I nun è gartegià al cusseglia guvernantiv da persuader la maiortad dal parlament: Cun 90:21 vuschs ed in'abstenziun ha refusà quel la dumonda Perl da stritgar il puncts 3 e 4 or da l'incumbensa Cramerì. Cun 94:21 vuschs ed in'abstenziun ha il cussegl grond acceptà quest'incumbensa.

L'incumbensa divisa en quatter puncts

La maiortad dal parlament grischun ha decis dad incumbensar la regenza da sutmetter ils causals penals chantunals a l'examinaziun, sch'els èn necessariis e cunvegents, e da far in rapport ed ina proposta al cussegl grond, quals ch'ins pudess abolir. Sco segunda duai la regenza s'engaschar per in'extenziun dal catalog da delicts en la procedura da multas disciplinaras, terza da s'engaschar per in sistem d'admoniziun empè da pronunziar sancziuns penals en cas da surpassaments minimalis. Sco ultim vegn la regenza incumbensada da prevair custs da procedura commensurads en cas da delicts minimalis, da procurar ch'els na surpassian betg u betg essenzialmain la sancziun pronunziada.